

Թ. ՄՈՄՁԷՆԻ ՄԱՀՈՒԱՆ ԱՌԻԹՈՎ

I

Պրուսական ոգին Գերմանիայում

Նոր Գերմանիան՝ ինչպէս յայտնի է, իր միութեան հետ միաժամանակ հռչակեց ոյժի, հզօրի իրաւունքի պաշտամունքը։ Քաղաքական այդ դաւանանքը, որ հնազոյն անցեալից մնացած մի անհաճոյ ժառանգութիւն է, մեր ժամանակներում էլի մի անգամ ազգերի եղբայրութեան և արդարութեան գաղափարի հանդէպ ցցուեց որպէս գերմանական Վալհալլայից դուրս եկած մի լեզենդային գինուած ոգի։ Իրերի այս նոր կացութիւնն ըստեղծելու մէջ Պրուսիայի խաղացած դերը ահագին եղաւ։ Նա տուեց ազդանշանը և ղեկավարեց բոլոր շարժումը։ Բնորոշելու համար այս բոլորը՝ դուցէ սխալ չլինի ասել, որ ոչ թէ գերմանական մանր-մունր պետութիւնները միացան և կազմեցին մեծ Գերմանիա, այլ Պրուսիան բարոյապէս աճեց, լայնացաւ ու փռուեց նրանց բոլորի վրայ։ Նոր Գերմանիան մի մեծ Պրուսիա է։

Եւ Պրուսիայի չորացնող շունչը անցաւ Գերմանիայի մի ծայրից միւրը, առաջ բերելով հասարակական-քաղաքական հասկացողութիւնների հիմնական յեղաշրջումն «Զինուած բռնուցքը», նւթապաշտական ձգտումները և ծայրայեղ շովինիզմը դարձան նոր կեանքի առաջնորդող սկզբունքներ և մի մեծ ու քաղաքակիրթ երկրին վայել զուտ մարդասիրական գաղափարներ ճնշեցին ու խամբեցին։ Երեսուն և աւելի տարիներ են անցել, բայց դեռ պրուսական ոգին իշխում է Գերմանիայում՝ այնքան մեղադրանքների, յարձակումների, թշնամանքների առիթ տալով շատ շատերին և ցաւ պատճառում խաղաղու-

թեան և ազատութեան լուսամիտ և անողկմնակալ բարեկամներին:

Ճշմարիտ է, շատ անգամ այդ մեղադրանքները գէնք են ծառայում շահագրգռած օտարների ձեռքին յախուռն ու փութկոտ ընդհանրացումների, անարդար ծայրայեղութիւնների համար: Թշնամանողների մէջ բնականապէս սակաւ չեն և այնպիսիները, որոնց երկրի պատմութիւնը անթիւ ամօթալի էջեր է պարունակում: Յաճախ մոռացութեան է տրուում, որ Գերմանիան այնուամենայնիւ գիտականփիլիսոփայական ղեղեցիկ աւանդութիւնների կրօնական հայրենիքն է, ուր բազմաթիւ են նաև լայնսիրտ, մեծահոգի քաղաքացիներ, որոնք իրանց երկրի սահմաններից շատ հեռուն տեսնել և զգալ գիտեն: Փրանս-պրուսական պատերազմից անցել են երեսուն և աւելի տարիներ, և այդ ժամանակը անազին փոփոխութիւն է առաջ բերել Գերմանիայի ժամանակակից սերնդից շատերի աշխարհայեացքների մէջ. ղինւորական-քաղաքական Գերմանիայի կողքին բարձրացել է այժմ ընկերավարական Գերմանիան ուժեղ ու կազմակերպուած, որ ով գիտէ, ինչ անակնկալներ է պատրաստում ոչ շատ հեռուորապագայի համար:

Այս բոլորը ճշմարիտ է, բայց տարաբախտաբար ճշմարիտ է և այն, որ գերմանական այն հին, լաւ սերունդը, դարաւոր ղեկանների աշտարակների մելանխոլիկ ստուերներում երազել ու խորհել սիրող շիկահեր բարի գլուխները չկան այլևս: Ներանց տեղ մի բուրժուա, մեծամիտ, յաւակնոտ սերունդ է իշխում, որ յաղթական Գերմանիայի փառքով արեցցած՝ սիրում է ամեն օր և ամեն տեղ յոխորդանքով երգել իր Deutschland-ի գերազանցութիւնը աշխարհի բոլոր ցեղերի, բոլոր երկրների վրայ, և որի ականջներին չափազանց խորթ են հնչում թոյլերի, տրորուածների ճիչերը: Տարաբախտաբար Գերմանիայի քաղաքական-հասարակական կեանքին ընթացք, ուղղութիւն տուողները տակաւին սրանք են և ոչ թէ սրտացաւ, բարեմիտ հոգիները:

Նւ ամենօրեայ կեանքը բազմաթիւ մանր ու մեծ փաստերով գալիս է ապացուցանելու բիսմարկեան Գերմանիայի մասին ընդհանրացած մեղադրանքների գէթ խոշոր մասի ճշտութիւնը՝ ցաւալի ու վհատեցուցիչ խոհերի առիթ տալով: Այդ փաստերը ևս առաւել նշանակալից և ճշող են դառնում, երբ նրանց մատակարարողը գերմանական ամենաշահիւ սերունդն է, ուսանողութիւնը, այն խենթ հասակը, որ բոլոր ժամանակներում, բոլոր երկրներում միշտ հանդիսացել է առաջապահ գունդ

լաւագոյն գաղափարներ, գեղեցիկ զոհաբերութիւններ: Ոյժ և շահ, ահա թէ թնչ են փառաբանում նրանք առանց կարմրելու, շատ անգամ կոչումն անելով այս կամ այն ձեռնտու փրկիսոփայական վարդապետութեան իրանց բերտ գաղափարները պաշտպանելու համար: Բիսմարկ, Մոլտկէ և Վիլհելմ դարձել են նրանց գերագոյն երրորդութիւնը, որի մասին կարելի է խօսել երկիւղած, անքննադատ պատկառանքով և կամ որի առաջ պէտք է խոնարհուել պաշտամունքի լուրթեամբ:

Ես երբեք չեմ կարող մոռանալ մի քանի բնորոշ փաստեր գերմանացի ուսանողների կեանքից: Շվեյցարական մի պանսիոնում, ուր բազմաթիւ էին նաև գերմանացի ուսանողներ, խօսակցութեան մշտական առարկան, վիճաբանութեան անընդունելի մարդկային հոգին ղեկավարող բարոյական օրէնքներն էին: Վէճերը առանձնապէս սուր և աղմկալի էին դառնում սովորաբար փրկիսոփայութեան դասերից յետոյ: Բարոյագիտական տեսական խնդիրներից իրականութեան և յատկապէս գերմանական իրականութեան անցնելը շատ բնական էր: Յիշում եմ, իմ դէմ ու դէմ միշտ նստած էր լինում մի բարձրահասակ, թիկնաւէտ գերմանացի երիտասարդ՝ պարոն Ֆեդընը: Բնաւորութեամբ շիտակ, ուղղամիտ իր մասնաւոր յարաբերութիւնների մէջ, միշտ կորրեկտ, աշխատասէր ու տոկոս, քայլուածքով խրոխտ, գինւորականի պէս, այդ ուսանողը գերմանացի երիտասարդի իսկական տիպար էր: Մասնաւոր խօսակցութիւնների մէջ, զարեջրի սեղանի առաջ նա հիանալի էր, բացսիրտ, ուրախ. բայց երբ մէջ էին ընկնում բարոյական, հասարակական, քաղաքական խոշոր խնդիրներ, երբ մանաւանդ՝ խօսակցութիւնը դառնում էր գերմանական կառավարութեան ընթացքին, Վիլհելմ կայսրի և սուլթանի բարեկամութեանը, Բիսմարկին ևայն, նա դառնում էր անտանելի: «Ո՛չ մի բարոյական օրէնք, կրկնում էր նա, նրանք բոլորն էլ յարաբերական են ժամանակի և տարածութեան մէջ, հաստատունը և անխախտը սեփական կարողութիւնն է, անհատական գերակշռող յատկութիւնները, ոյժը. «բնական ընտրողութիւնը» միակ օրէնքն է, որ միշտ կ'իշխի, պատերազմը յաւիտենական է, և յաղթողը միշտ իրաւունք ունի: Ընկերներից և ոչ մէկը նրան հակառակ չէր: Մի անգամ պարոն Ֆեդընը սաստիկ վրդովուած էր անգլիացոց դէմ հարաւ-աֆրիկեան պատերազմի՝ չգիտեմ որ էպիզոդի պատճառով:

— Հապա՛ ձեր Շչէզվիգ-Հոլտայնը, Ալզաս-Լորէնը, ասացի նրան:

—Այդ ուրիշ բան է, օձ, իհարկէ, այդ ուրիշ բան է, նը-
րանք մերն էին, հին գերմանացիներ, պէտք էր յետ առնել:

—Հապա՛ ձեր կայսրի և ձեր բարեկամութիւնը սուլթա-
նի, թիւրքերի հետ, որոնք ձեզնով քաջալերուած՝ կոտորում են
քրիստոնեաներին:

Նա մի վայրկեան կարկամեց, ապա գերմանացու կոշտ
ֆրանսերէնով և յաղթական տոնով բացազանչեց.

—Il nous faut manger, monsieur!—մենք ուտելու պէտք
ունենք, պարոն—և այդ manger (ուտել) բառը նա այնպիսի
թափով արտասանեց, որ կարծես պատրաստուում էր բան կուլ
տալ: Եւ այդ պարոնը միայն քսան տարեկան էր:

Նոյն պանսիոնում մի օր յայտնուեց մի ուրիշ գերմանա-
ցի երիտասարդ, նիհար, հիւանդ, վատոյժ: Յետոյ իմացանք, որ
նա տառապում էր թոքախտով: Այդ երիտասարդի արտաքինն
այնքան խղճալի էր, որ դժուար էր նրան նայել առանց խո-
րին կարեկցութեան. նա միայն արգահատանք էր ներշնչում:
Պօսակցութիւններին, վէճերին նա չէր մասնակցում, լսում էր
ուշադրութեամբ, և միայն շրթունքները թեթևակի շարժում
էին, առանց որ մարդ կարողանար մի բան հասկանալ նրա ա-
սածից: Մի երեկոյ տուն վերադառնալով՝ պառաւ տանտիկ-
նոջը գտայ սաստիկ վրդովուած:

—Կարձղ էք երևակայել, ասում էր յուզուած ձայնով բա-
րի կինը,—ոչ, այդ սարսափելի է, այդ հիւանդ երիտասարդը,
որին ամենքս խղճում ենք, մի անսիրտ, անողորմ գազան է-
այսօր ձեր բացակայութեանը նա ինչէր ասաց, տէր Աստուած.
երևակայեցէք, նա ամենայն հանդարտութեամբ ասում էր, որ
թիւրքերը պէտք է մի հատիկ հայ թողած չլինէին աշխարհի
վրայ, նրանց պէտք է կոտորել, ապստամբներ են կայն կայ-
լըն... այդ անտիճան անսիրտ, շարունակեց բարի կինը, նա՛
այդ ողորմելի հիւանդը, որ վաղը միւս օրը պիտի մեռնի: Ես՝
ինչ ասել կ'ուզեի՝ վրդովուեցի, միայն դարմացայ, որ այդ փրկ-
րուն, մաշուած մարմնի մէջ ապրում է մի այդքան բիրտ հո-
գի, այդքան մութ խիղճ:

Մի ուրիշ գերմանացի ուսանող հիացմունքով, ոգևորու-
թեամբ պատմում էր ինձ, թէ ինչպէս պրուսական կառավա-
րութիւնը բոլոր միջոցներով աշխատում է հողագործի դարձնել
լեհ գիւղացիներին: Նրան առանձնապէս զբաղեցնում էր լեհա-
ցիների երկար մազերը. «այդ մազերը զգուելի են, ասում էր
նա թունոտ աստելութեամբ. երբ մենք նրանց զինւոր ենք վեր-
ցընում, կտրում ենք, նրանք դժգոհ են լինում. վատ են, վատ
են լեհացիները»: Եւ ինչ-որ աւելի տարօրինակ է, նա երեխայի-

պէս զարմանում էր, որ ես իրանց վարմունքը համարում էի զար-
շելի, անպատուաբեր մի մեծ քաղաքակիրթ ազգի: Ամենից վհատե-
ցուցիչը, ամենից տխուրը այս բոլորի մէջ ըստ իս հէնց այդ
«զարմանքն» է, այդ անգիտակից վատութիւնը:

Եւ այսպիսի բազմաթիւ այլ փաստեր կարելի է մէջ բե-
րել: Համարեա իւրաքանչիւր ոք, որ շփուել է գերմանացիներ-
ի և մասնաւորապէս ուսանողների հետ, կարող է այս օրինակ-
ների շարքն աւելացնել: Այդպէս է գերմանական շովէն, բուր-
ժուա երիտասարդութիւնը. ինչ որ ասել են Բիսմարկ և
Վիլհելմ, նրանք էլ կրկնում են առանց քննադատելու, հակա-
ռակ կարծիք լսել անգամ չեն կամենում: Նրանք նոյնիսկ չեն
քաշուի վերաւորել մէկին, որ համարձակուում է քննադատել
իրանց կառավարութեան և մանաւանդ Վիլհելմի գործողու-
թիւնները: Մի ծանր, յետադէմ շունչ է փչել այս երիտասարդ-
ների ճակատների վրայով և խամրել, մեռցրել է ամենագեղե-
ցիկ գաղափարները: Փրանսիացի յայտնի պատմաբան Լավիսս
իր ընդհանուր պատմութեան մէջ խօսելով գերմանական նոր
կայսրութեան և ֆրանկ-պրուսական պատերազմի մասին ա-
սում է. «Գերմանական կայսրութեան շէնքի ծեփը շաղխուեց
ֆրանսիական արիւնով»: Նա կարող էր աւելացնել՝ «...և գեր-
մանական սրտերով»: Գերմանական կրօնաբանաց ֆրիդրիխ-
Վիլհելմ իր յիշատակարանում 1870 թ. գրում էր.

«Դեկտեմբեր 30, 1870. այսօր կայսրութիւնը և կայսրը
անդառնալի կերպով հաստատուած են. այսպէս վերջացաւ
վաթսուն և հինգ տարուայ անիշխանութիւնը (interregne). այ-
սօր առանց կայսր մնացած մի կայսրութեան սոսկալի դատար-
կութիւնը լցուեց»: Այս մի քանի տողերը իրանց լակոնակա-
նութեամբ ազդու, բովանդակութեամբ նշանակալից՝ չափազանց
բնորոշ են. մի «դատարկութիւն» լցուեց Միացեալ Գերմանիա-
յում, բայց մի ուրիշ դատարկութիւն բացուեց, սրտերի դա-
տարկութիւնը, որ տարաբախտաբար իր զարհուրելի հակահա-
րուածն ունեցաւ ամբողջ Եւրոպայում, նոյնիսկ ամբողջ աշ-
խարհում. ազգերի կրծքին կոշմարի պէս ծանրացած միլիտա-
րիզմը, որ ներկայումս լափում է մարդկութեան լաւագոյն ոյ-
ժերը, եռանդը, պատմութեան անողորմ տրամաբանութեամբ
ծագում է առել նոյն «դատարկութիւնից»:

Ուշադրութեան արժանի երևոյթ է, որ նոյնիսկ այն ան-
ձինք, որոնք ամենից աւելի օժանդակել են գերմանական միու-
թեան, կայսրութեան հիմնուելուն, տարիներ յետոյ. իրանց
ստեղծած գործի առաջ կանգնած՝ տխրութեամբ թափահարել
են իրանց ծեր գլուխները և անկարող են եղել ծածկել իրանց

դգացած խորին ցաւը իրերի նոր կացութեան առաջ: Դրսից հօր ու փառաւոր այդ կայսրութիւնը ներքուստ չի համապատասխանել նրանց փայփայած յոյսերին, նրանց վարդապետն երազներին: Գերմանիայի միութեան հետ այլ իդէալներ էին կապուած՝ քան ինչոր իրականացան: Այսպէս՝ պատմաբան Տրէյչլիկէն, որ իր «XIX դարի Գերմանիայի պատմութեամբ» և առհասարակ իր քաղաքական պրոպագանդայով այնքան օժանդակել էր միութեան դադափաբի իրագործման, 1895 թւի յուլիսի 19-ին Բերլինի համալսարանում մի հայրենասիրական ճառ արտասանեց, որ ահագին աղմուկ հանեց Գերմանիայում:

«Մեր բարբերում ամեն ինչ դարձել է աւելի բիրտ, և՛ քաղաքականութիւնը, և՛ կեանքը,—ասաց Տրէյչլիկէ...—Եթէ քաղաքականութիւնը աւելի բիրտ է դարձել, նրա պատճառը փնդրելու է մեր հասարակական կեանքի անհանգստացնող փոփոխութեան մէջ: Շատ բան, որ մենք մի ժամանակ համարում էինք հոռմէական կայսրութեան անկման արդիւնք միայն, իրօք քաղաքների ինտենսիւ կուլտուրայի հետևանք է, որ այժմ մեզ էլ է հեղեղում; ինչպէս մի ժամանակ հոռմայեցիներին... պատկառանքը, որ Գէոթէն անուանում էր ամեն մի բարոյական դաստիարակութեան վերջին նպատակ, նոր սերնդից հեռանում է սարսափելի արագութեամբ: Անհետանում է Աստուծոյ երկիւղը, երկու սեռերի մէջ բնութեան և հասարակութեան դրած սահմանների յարգանքը, հայրենիքի սէրը, որ օր-աւուր մաշւում է վայելքների միայն հետամուտ մարդկութեան Փանտոմի առաջ: Գանի կուլտուրան տարածւում է, այնքան աւելի նա դառնում է տափակ: Արհամարհում են դասական աշխարհի խորութիւնը և գնահատում են այն, ինչ ծառայում է մօտիկ, անմիջական շահերին: Այսօր, երբ իւրաքանչիւրը խօսում է իր լըրագրի և իր խօսակցութեան բառարանի լեզուով, հազադիւտ է դարձել սոեղծագործող ոգու զօրութիւնը և սեփական տգիտութիւնը խոստովանելու քաջութիւնը... Գիտութիւնը, որ մի օր պրպտում էր այնքան խորերը անհունին հասնելու համար, այսօր փուռում է մակերևոյթապէս միայն... Ձանձրալի կեանքի դադարկութիւնը մի կերպ լցնելու համար ձիարշաւների գրադները դառնում են առաջնակարգ կարևորութիւն ունեցող երկոյթներ, և երբ տեսնում ենք ցիրկերի հերոսների և խեղկատակների վայելած յարգանքը, մենք նողկանքով մտածում ենք Կարակալայի պալատի հրէշաւոր, բայց և թանկագին քսանութ մրցողների մասին: Այս բոլորը ժամանակի լուրջ նշան է» *):

*) A. Guillaud: «L'Allemagne nouvelle».

Գերմանական ժամանակակից սերնդի այս պատկերը գրծագրուած մի յայտնի, խոշոր տաղանդի տէր, հայրենասէր և իմպերիալիստ գերմանացու ձեռքով չափազանց պերճախօս է, որպէսզի պէտք լինի նոր օրինակներով ու քաղուածներով խտտացնել գոյները: Եւ սակայն իդէպ է այստեղ յիշել, սա այն Տրէյչիկէն է, որ տարիներ առաջ հնարաւոր էր համարել գրել հետեւեալ տողերը. «Մի լաւ պաշտօնեայ աւելի անհրաժեշտ է պետութեանը, քան թէ մի բանաստեղծ»: Սա կարող է ճշմարիտ լինել, բայց մի պայմանով, որ Տրէյչիկէները իրանց կեանքի վերջալուսին տխրութեամբ կրկնեն, թէ ամեն բան դարձել է կոպիտ, մակերևոյթական ու տափակ: Առանց բանաստեղծութեան կեանքն անապատ է:

*
*
*

Գերմանիայի կեանքը անցեալ XIX դարի ընթացքում սակաւ աղմկալի չեղաւ. նախ Նապոլէոն I իր ջախջախիչ զինդերով, ապա բնատուրացիան, յետոյ քառասուն ութ թւի յեղափոխութիւնը և վերջապէս Բիսմարկեան պատերազմների ամբողջ շարքը, որ հեռաւոր և մօտիկ անցեալի երկունքի լուծումն էր: Եւ բոլոր այս քաղաքական խոշոր ցնցումների, արտաքին և ներքին կռիւների տակ կատարւում էր մի աշխատանք՝ դանդաղ ու հաստատ: Արտաքին պայմանների ազդեցութեան տակ կամաց-կամաց հասունանում էր մի գաղափար, մեծ, միացեալ Գերմանիայի գաղափարը, որ Նապոլէոնի սարսափելի հարուածից յետոյ անշուշտ պիտի կարողանար գոհացումն տալ բոլոր վերաւոր հոգիներին, ազգային փառքի ծարաւ սըրտերին: Ամբողջ կէս դար այդ գաղափարի իրագործման համար աշխատում էին բոլոր նրանք, որոնք իրանց պատմութեան գիտակցութիւնն ունէին և պատմական ճակատագրի արժէքն էին ըմբռնում. փիլիսոփայութիւն և պատմութիւն, բանաստեղծութիւն ու վիպագրութիւն հաւասար եռանդով աշակցեցին իրար՝ պատրաստելու համար այն, ինչ-որ եղաւ: Յամառ, տենդոտ ու լայնածաւալ այդ աշխատանքի մէջ բազմաթիւ չափազանցութիւններ, անարդար ընդհանրացումներ, փութկոտ դատավճիռներ, անհիմն մեղադրանքներ, ինչպէս և ազգային փեղուն մեծամրտութեան օժանդակիչ քարոզներ անխուսափելի եղան: Մեծ գաղափարը՝ Գերմանիայի միութիւնը իրագործուեց, բայց իր հետ կապուած պահեց այնպիսի բարքեր, այնպիսի բարոյական հասկացողութիւններ, արդիւնք կէս դար կատարուած պրոպագանդայի, որոնց համար իւրաքանչիւր ազնւասիրտ, ուղղամիտ,

նախապաշարմունքներէց ազատ գերմանացի այսօր չի կարողանում առանց խորին ցաւի մտածել: Քիչ առաջ տեսանք Տրէյչիկէի արտասանած հրապարակական մեղադրանքը. և նա մենակ չէ: Արդարացաւ Բընանի մի գեղեցիկ նամակի հետեւեալ խօսքերը՝ ուղղուած իր բարեկամ Դաւիթ Շտրաուսին, որ նոյնպէս յաղթանակի արեւցողութեան մէջ դարձել էր ոյժի երկրպագու. «Ծայրայեղութիւնը վատ բան է, գրում էր Բընան, գոռոզութիւնը միակ ախտն է, որ պատժուում է այս աշխարհում» *):

Գերմանիայում իշխող «ծայրայեղութիւններն», չպարտաւորուող «գոռոզութեան», մեծամտութեան, թոյլերի վերաբերմամբ արդարութեան ամենատարբական գաղափարի մոռացութեան մէջ անշուշտ ազգային պատմագրութիւնն էլ իր խոշոր բաժինն ունի: Դաստիարակչական տեսակէտից պատմութեան դերը անագին է, ոչինչ այնքան չի գուրգուրում մանուկ սերունդի երեւակայութիւնը, այնպէս չի փայփայում նրա այս հետաքրքրութիւնը, որքան խոշոր պատմական դէմքերը և նշանաւոր արկածները: Պատմութեան դիտաւորեալ, կանխակալ ուսուցումը այս կամ այն ուղղութեամբ ընդունակ է մանուկ հոգինները խեղաթիւրել շատ անգամ անդառնալի կերպով: Անշուշտ՝ ծայրայեղ անարդարութիւն կը լինէր պնդել, թէ XIX դարի գերմանական խոշոր պատմաբանները, որոնք մեծամեծ ծառայութիւններ մատուցին գիտութեանը իրանց մեթոդով, ուսումնասիրութիւններով, իրանց անգնահատելի հմտութիւններով, բոլորն էլ դիտաւորեալ ձևով աղաւաղել են պատմութիւնը կամ հանել են անճիշտ եզրակացութիւններ մօտաւոր, գործնական նպատակների համար: Բայց նոյնքան անարդարութիւն չի լինի ասել, որ նրանք՝ այդ պատմաբանները, հակառակ նոյնիսկ իրանց կամքի՝ անկարող պիտի լինէին կտրուել իրանց միջավայրից, բարձրանալ ընթացիկ կեանքից վեր, մոռացութեան տալ ժամանակակից պայմանները, իրանց շատ անգամ զուցէ իրաւացի անձնական համակրութիւններն ու հակակրութիւնները և անցեալը ներկայացնել միանգամայն օրինելու եղանակով: Անհատի հոգեկան, բարոյական կապերը իր միջավայրի հետ միշտ չափազանց խորն են և հաստատ, որպէսզի հնարաւոր լինէր մի այդպիսի աբստրակցիա: Արտաքին պայմանները, ժամանակակից պահանջները, մթնոլորտի մէջ խաղացող գաղափարները, ձգտումները, որոնք ծնունդ են առնում յայտնի ընդհանրութիւնից, յայտնի էպոխայում, նման են վարարած գետի յորձանքներին, որոնցից խուսափելը շատ անգամ անկարե-

*) Renan: «La reforme intellectuelle et morale».

լի է: Ուշադրութեան արժանի մի հանգամանք է, որ անցեալ դարի առաջին կէսը մեծ խմորումներէ, խոշոր երազներէ ու յոյսերի մի վերին աստիճանի կրիտիկական անհանգիստ շրջան եղաւ Գերմանիայի համար: Նա մտածում էր, պատրաստուում էր Նապոլէոն I-ի տուած դառն դասը ապագայում անկարելի դարձնել: Ոչ ոք չէր կարող և անհնարին էր աչք փակել այդ վճռական ժամանակի վրայ. պատմաբանները չէին, որ պիտի կարողանային դուրս մնալ ընդհանուր հոսանքից:

Անցնենք այժմ բուն նիւթին՝ գերմանական պատմագրութեանը և նրա խաղացած դերին, որ սոյն յօդուածի անմիջական և գլխաւոր նպատակն է կազմում:

* * *

Անցեալ դարի սկիզբը և յատկապէս 1806 թ. Գերմանիայի դժբախտութեան և նրա ապագայ փառքի սկզբնաւորութեան տարին եղաւ: Այդ նշանակալից թւականին Ենայի պատերի տակ Նապոլէոնի զնդերը զարհուրելի կերպով ջախջախեցին Պրուսիան, գերմանական միակ պետութիւնը, որ համարձակուել էր սուր վերցնել գոռոզ աշխարհակալի դէմ: «Պրուսիան վերջացաւ, գրում էր Սուլթանին Նապոլէոնը Ենայի ճակատամարտի յաջորդ օրը, Եւրոպայի քարտէզից նա ջնջուեց»: Եւ այդ «ջնջուած» Պրուսիան էր, որ մօտ կէս դար յետոյ՝ իր ոտների տակ դրեց մի ուրիշ Նապոլէոնի (III) Սեդանում. պատմութեան դասերը զարհուրելի են: Ըմբռնելու համար 1806—1871 (Ենայից—Սեդան) շրջանում զարգացած մտաւոր հոսանքի բոլոր արժէքն ու մեծութիւնը Գերմանիայում՝ անհրաժեշտ է մի ակնարկ ձգել գերմանական պատմութեան փիլիսոփայութեան վրայ մինչև Ենայի ճակատամարտը, մինչև այն զարհուրելի մրրիկը, որ աւերածով զարկուեց գերմանացիների վրայ: Պատմագրութիւնը այդ ժամանակում՝ համակուած էնցիկլոպեդիստների վարդապետութիւններով՝ գերազանցօրէն կոսմօպոլիտ է: Հայրենիքի և ազգութեան գաղափարը դուրս է մղուած պատմութեան փիլիսոփայութիւնից և նրա տեղ բռնել է մարդկութեան սէրը, տիեզերական մարդկութեան, որ գերմանացին երազում է աշուրոյ, համարեա եթերային ձևով:

Նոր Գերմանիայի նոյնիսկ հիմնադիրներէից շատերը ազգային զգացմունքը նկատում էին որպէս հոմանիշ բանականութեան հակառակ նախապաշարմունքների: Լեսսինգը խոստովանում էր, որ ինքը չի հասկանում, թէ ինչ է նշանակում հայրենասիրութիւն, ազգային զգացմունք. «Հայրենիքի սէր ես չեմ

հասկանում, ասում էր նա, այդ զգացմունքի մասին եթէ լաւ լեզու գործածելու լինինք, պէտք է ասենք, որ դա մի հերոսական թուլութիւն է: Ես խիստ երջանիկ եմ, որ այդ թուլութիւնից ազատ եմ: Գէոթէն և Հեգելը հայրենասիրական զգացմունքից բոլորովին զուրկ էին. տիեզերքի և մարդկութեան տեսական կուլտը նրանց համար ամեն ինչ էր: Շիլլերն ասում էր, թէ հայրենասիրական զգացմունքը կարող էր որեւէ արժէք և նշանակութիւն ունենալ ժողովուրդների պատմութեան նախնական շրջանում, աշխարհի մանուկ ժամանակ: Բայց այժմ, քաղաքակրթութեան այս աստիճանում լուրջ մարդիկ որեւէ ազգի վրայ առանձին ուշադրութիւն դարձնել կարող են միմիայն այն դէպքում, երբ այդ ազգի ճակատագիրը որեւէ ազդեցութիւն ունի մարդկային տեսակի վրայ» *):

Բայց ամենից հետաքրքիրը և բնորոշը Ֆիխտէի կարծիքն է հայրենիքի և ազգութեան մասին Նյայի ճակատամարտից առաջ, այն Ֆիխտէի, որ պատմական այդ խոշոր անցքից ամիսներ միայն յետոյ գերմանական ազգին ուղղած իր կրակոտ կոչերով այնպիսի խորը ցնցումն առաջ բերեց ժողովրդի բոլոր խաւերում և օժանդակիչ հանդիսացաւ ազգային զգացմունքի, մեծամտութեան անօրինակ զարգացման:

Ո՞րն է, հարցնում եմ ես, բացազանչում էր Ֆիխտէ, իսկապէս քաղաքակրթ և քրիստոնեայ եւրոպացու հայրենիքը: Ընդհանուր առմամբ՝ դա Եւրոպան է, իսկ մասնաւորապէս՝ այն երկիրն է, որ քաղաքակրթական սանդուխքի վրայ բռնած ունի ամենաբարձր աստիճանը: Այն պետութիւնը, որ մի ճակատագրական սխալ է գործում, իհարկէ, կ'ընկնի ժամանակի ընթացքում և կը դադարի գրաւել նոյն տեղը: Բայց թէև նա ընկնում է՝ և պէտք է ընկնէր անհրաժեշտապէս, — ուրիշները հէնց այդ պատճառով բարձրանում են, և սրանց մէջ յատկապէս մէկը, որ բռնում է առաջինի բռնած տեղը: Թողնենք ուրեմն նրանց, որոնք ծնունդ են երկրից և որոնք իրանց հայրենիքը փնդրում են հողի, դետերի և լեռների մէջ, թողնենք նրանց միալ քաղաքացիներ ընկած պետութեան: Նրանք պահպանում են, ինչ-որ սիրում են և ինչ-որ կազմում է նրանց իսկական երջանկութիւնը: Մարդկային հոգին նման արեգակին, հնազանդուելով մի անդիմադրելի ձգողականութեան, կը նետուի միշտ դէպի լոյս և ազատութիւն: Հոգու այսպիսի կոսմոպոլիտ կազմութիւնը մեզ հնարաւորութիւն է տալիս մի կատարեալ անդորրութեամբ դիտել ազգերի գործերը և նրանց

*) R. Frintz «La philosophie de l'histoire en Allemagne».

ճակատագիրը, թէ մեզ և թէ մեր յեանորդների համար և այն մինչև յաւիտեան» *)։ Եւ այս բոլորը Ֆիխտէն գրում էր Ենայի ճակատամարտից միայն մի քանի ամիս առաջ, իսկ 1807 թւին, ուրեմն այդ նշանակալից պատմական անցքից ընդամենը մի քանի ամիս յետոյ, երբ. Պրուսիան արիւնաթաթաւ փրոռուած էր գետին, նա արտասանում է իր նշանաւոր ճառերը, **) որոնց մասին կը տեսնենք իր տեղում։ Պակաս կոսմոպոլիտ և դէպի իր հայրենիքի ճակատագիրը անտարբեր չէր նաև Ֆիխտէի նշանաւոր աշակերտ՝ Ելլինգը։ Վերջինս փիլիսոփայական կատարեալ անդորրութեամբ գրում էր իր աշակերտ և բարեկամ Հանրի Ստեֆենսին. «Ի՞նչ հարկաւոր է նետուել այս աշխարհի աղմուկների մէջ. ի՞նչ օգուտ կ'առաջանայ դրանից միթէ տեղը չէ ասելու, որ մեր թագաւորութիւնը այս աշխարհում չէ»։

Գերմանիայում XVIII դարի վերջում հիւմանիտեր և կոսմոպոլիտ գաղափարների իրական դարգացմանը քիչ չնպաստեց նաև Հերդերի նշանաւոր աշխատութիւնը, որ պատմութեան փիլիսոփայութեան առաջին լուրջ գործն եղաւ ***): Հերդեր իր հայեացքների եթէ ոչ խորութեամբ, գէթ լայնութեամբ, իր մտքերի համամարդկային թռիչքով, իր լեզուի ճոխութեամբ, ոճի անկեղծութեամբ, իր մեծ սրտի ջերմութեամբ ժամանակակից սերնդի վրայ անշուշտ ահագին ազդեցութիւն ունեցաւ։ Պատմութեան ամբողջութիւնը նրան ներկայանում է որպէս մարդկութեան և մարդու երջանկութեան ու կատարելութեան յաջորդական մի հանդէս։ Մարդկային բնութեան վերջին նպատակը Հերդերի համար մարդկութիւնն է։ Եւ պատմութեան բոլոր փաստերը, դարերի ընթացքում տեղի ունեցած անթիւ յեղիւնները նա բացատրում է այդ մի հատիկ նպատակով։ Գերազանցօրէն հումանիստ, նա խօսք չի գտնում խաղաղանելու մեծամեծ աշխարհակալութիւնները և մասնաւորապէս ծանրանում է հռոմէական պատմութեան վրայ, որ նա համարում է յափշտակութեան, կողոպուտի, ակերածի մի պատմութիւն։ Ճեղարկումը նրա համար խոտելի է, և նա գարշաւքով երես է դարձնում սրածութիւններից՝ մտքի աստուածային արտադրութիւնների՝ զեղարուեստի, գիտութեան վրայ իր հայեացքը հանգստացնելու համար։ Դասական աշխարհը նրա համար Յունաստանն է, ուր միաբն և իդէան իշխեցին, և ոչ Հռոմը, որ եկաւ իր երկաթէ ոտների տակ տրորելու ժողովուրդներին։

*) Fichte: «Les Caractéristiques de l'âge présent».

**) Discours à la nation allemande.

***) Herder: «Idées sur une philosophie de l'histoire de l'humanité».

Հերդերի պատմութեան փիլիսոփայութիւնը վաղուց է արդէն համարուում անբաւարար և հնացած հայեացքներով ծանրաբեռնուած. բայց մի բան, որ նրանից խել անկարելի է, այդ նրա տիեզերականութիւնն է, մարդու և նրա ճակատագրի մասին ունեցած թէև միակողմանի, բայց լայն ըմբռնումն է. նրա փիլիսոփայութեան մէջ այնպէս շնչոտուած են այս բոլորը, որ յետագայ տարիներում գտնուում էին, թէ Հերդերի պատմութիւնը փնտսակար եղաւ գերմանացիներին՝ զարգացնելով նրանց մէջ աշխարհաքաղաքական զգացմունքը միակողմանի ձևով մինչև այն աստիճան, որ մայր հայրենիքը մոռացութեան տրուեց: Այս մեղադրանքը գուցէ այնքան էլ զուրկ չէ հիմունքից, եթէ աչքի առաջ ունենանք Հերդերի կոսմոպոլիտիզմը և մանաւանդ նրա հայեացքը հայրենասիրութեան զգացմունքի մասին: «Դա մի զարհուրելի բան է, ասում է նա, հակաբնական մի կիրք, մի տեսակ բարբարոսութիւն, անարժան որեւէ քաղաքակիրթ ժողովրդի» *):

Միևնոյն ժամանակ Կանտ իր սքանչելի հանճարի զարմանալի արտադրութիւններով ահագին մղումն տուեց զուտ գիտական ոգուն՝ փիլիսոփայական մտքերի առաջ բանալով ուսումնասիրութիւնների, բարձր սպեկուլացիաների լայն ասպարէզ: Երիտասարդ սերունդը մեծ ուսուցչի յետուեց այդ ասպարէզը, և մարդկային բանականութիւնը, նրա կարողութեան պայմանները և սահմանները դարձան մանրակրկիտ ու խորին ուսումնասիրութեան իդէալական առարկաներ: Այս բոլորի մէջ տեղ չունէին զուտ գործնական մոտիւններ, վուլգեր իրականութեան, ընթացիկ կեանքի ամեն օր մատակարարած խնդիրներ, սահմանափակ, նեղ բնաւորութիւն ունեցող հարցեր: Գերազանցօրէն իշխողը կանտեան զուտ բանականութիւնը՝ նրն էր (la raison pure), մարդկային բնութիւնը, հոգեկան կարողութիւնները: Ահա թէ ինչու այնքան մեծ է Կանտին անմիջապէս յաջորդող փիլիսոփայութեան մէջ իդէալիզմը: Եւ XVIII դարի բոլոր դասական գրողները համարեա կոսմոպոլիտ են: Այդ հասկանալի է, եթէ ի նկատի ունենանք փիլիսո-

*) «Ես ընդունում եմ, որ Հերդերի տիեզերականութիւնը անկատար է և արտայայտում է իրերի միայն մի կողմը, բայց անշուշտ միևնոյն մեղադրանքը կարելի է ուղղել նաև ազգայնականութեան կամ հայրենասիրութեանը... այս երկու հասկացողութիւնները (կոսմոպոլիտիզմ և հայրենասիրութիւն) իրար հակառակ չեն, նրանք լրացնում են միմեանց: Մի գերմանացի, որ խորապէս ներշնչուած չէ տիեզերական գաղափարներով, նա մի տխուր նմուշ է իր ազգութեան»:

Flint: «La philosophie de l'histoire en Allemagne».

փայութեան ահագին ազդեցութիւնը ժամանակակից սերունդներին վրայ և մանաւանդ՝ գերմանական մտքի բնատուր յատկութիւնը՝ տարուել տեսական բարձր խնդիրներով՝ զուտ գիտական, յամառ, տոկուն, հետևողական հետազոտութիւններով:

Անգամ Նապոլէոնի վերաբերմամբ այդ սերնդի գաղափարները բոլորովին ազատ են ազգային գոյնից: Հիգել նրան համարում էր «աշխարհի ոգին», պատմաբան Ժան Միւլլերը «ժամանակակից դարի հերոս»: Գէոթէն լի հիացմունքով դէպի Նապոլէոնը, հետեւալ խօսքերով էր դիմում հայրենասէր գերմանացիներին, որոնք նոր էին սկսում իրար դալ. «Յնցեցէք ձեր շղթաները, որքան կամենաք, փշրել չէք կարող և միայն աւելի խորը կը թաղէք ձեր մսերի մէջ. այս մարդը (Նապոլէոն) շատ է հզօր ձեզ համար»: Դէյլինգեր ասում է. «Իմ և իմ ընկերների մի իդէալ ունենալու պահանջը մեր էութեան մի մասն էր, և ես յիշում եմ, թէ Նապոլէոն որպիսի հիացմունքի առարկայ եղաւ մեզ համար, թէև նա բնաւ արժանի չէր մի այդպիսի յափշտակութեան մեր կողմից»: Բազմաթիւ էին Նապոլէոնի պաշտողները նաև գերմանական գիւղերում: Պատմաբան Րանկէն մի օր պատահեց մի գիւղական ուսուցչի, որ սիրում էր Նապոլէոնին՝ որպէս մարդկութեան մի հերոսի և որին նա յատկացրել էր նախախնամական մի առաքելութիւն *):

Ահա այսպէս էր մօտաւորապէս գերմանական մտածող սերունդը Յնայի ճակատամարտից առաջ, և ահա թէ ինչ ոգի էր իշխում, առաջնորդում նրա միտքը նաև պատմութեան փիլիսոփայութեան շրջանում:

* * *

Յնայի ճակատամարտը Գերմանիայի համար եղաւ այն զուլումը, որ վառեց նրա հոգին և բիրտ, աշնողորմ իրականութեան, ցաւոտ, անխուսափելի անհրաժեշտութեան հանդէպ նրան ոտքի հանեց: Դժուար է համառօտ տողերով պատկերացնել այն, ինչ կատարուեց Գերմանիայում այդ ճակատամարտից յետոյ, այն աստիճանի բազմակողմանի, լայնատարած և հզօր էր օտար, անկոչ բռնութեան դէմ սկսուած հոսանքը: Թւում է թէ այդ արիւնոտ ու դժբախտ օրից յետոյ իւրաքանչիւր գերմանացի ոտքի ելած և թէև կամաց-կամաց, բայց հաստատ քայլերով գնում էր դէպի Սեդան: Ամբողջ կէս

*) A. Guillaud. «L'Allemagne nouvelle».

դար հարկաւոր եղաւ Ննայից Սեդան հասնելու համար, բայց Գերմանիան վերջիվերջոյ հասաւ եւ այդ ժողովուրդը իր վերածնութեան ընթացքում ունեցաւ իր մտաւոր առաջնորդները, որոնց մէջ փիլիսոփաները և պատմաբանները յետին տեղը չեն բռնում:

Մենք տեսանք, թէ ինչ էր մտածում Ֆիխտէն հայրենիքի և հայրենասիրական զգացմունքի մասին Ննայի ճակատամարտից քիչ առաջ, այժմ տեսնենք, թէ նա ինչ է ասում նոյն ճակատամարտից ամիսներ միայն յետոյ 1807 թւին: Ֆիխտէն պնդում է այդ ժամանակ, թէ կայ մի ժողովուրդ, որից ամբողջապէս կախուած է գիտութիւնը և իրական քաղաքականութեան յառաջադիմութիւնը: Նրա կործանումը առաջ կը բերի մարդկութեան բոլոր յոյսերի և բոլոր շահերի աւերած: Այդ ազգը գերմանական ազգն է: Գերմանական ժողովուրդը՝ շարունակում է Ֆիխտէ, միակն է, որ պահպանուել է մաքուր և անխառն: Միայն նա է պահպանում մի ինքնատիպ հանճար, ծածկում է իր կրթութիւնը և հոգւոր կարողութեան անըսպառ աղբիւրներ: Ֆրանսիացիք, ինչպէս և լատինական այլ ժողովուրդներ, հասած լինելով ժամանակից առաջ զարգացման և հասունութեան շնորհիւ անդադար մղումներ, միևնոյն ժամանակ լինելով զանազան ցեղերի խառնուրդ, այժմ արդէն ուժ ժառաղաւ են և ամուլ *): Այսպէս է պատմութեան դասը. նրա դառնութեան շնորհիւ հայրենիք չճանաչող, կոսմոպոլիտ, ծայրայեղ իդէալիստ Ֆիխտէն երեք տարում դարձաւ ծայրայեղ հայրենասէր, ազգայնական, շովինիստ և օտարատեաց: Բայց նա փիլիսոփա է, իսկ փիլիսոփայութիւնը գերազանցապէս կապուած է տրամաբանութեան հետ, ուստի հարկաւոր էր «*Caracteristiques de l'âge présent*»-ի և իր նոր «ճառերի» մէջ հակասութիւնը հարթել: Ֆիխտէի համար այդ դժուար չէ, նա այժմ կ'ասի, թէ այն ընտրեալ, եղակի երկիրը, որ բոլոր քաղաքակիրթ մարդկութեան հայրենիք պէտք է նկատել, Գերմանիան է, և ոչ թէ Ֆրանսիան, որ լատինական ցեղերը յոգնել են և ամուլ կտրել, որ քաղաքակրթութեան և գիտութեան ապագան բացառապէս կախուած է Գերմանիայի և ոչ Ֆրանսիայի ճակատագրից: Եւ այդ ասողը Ֆիխտէն է, իդէալիստ փիլիսոփան, Կանտի աշակերտը, ահագին հեղինակութեան տէր. հասկանալի է, թէ որքան մեծ եղաւ նրա «ճառերի» ազդեցութիւնն ամբողջ Գերմանիայում, և թէ մինչև որ աստիճան գերմանական ժողովրդին յատկացրած քաղաքակրթական դերը շո-

*) Fichte. «Discours à la nation allemande».

յեց ինքնասիրութիւններ և հիմունք դարձաւ դէպի օտարները և մասնաւորապէս դէպի ֆրանսիական տաճած ատելութեան:

Սկսուած շարժման գլուխ անցաւ Պրուսիան, և գործը պատրաստուեց յառկապէս մտաւոր հողի վրայ: Բարոն Շտէյ-նը, այս ֆանատիկ հայրենասէրը, որ գերմանական միութիւնը գլուխ բերող ամենախոշոր դէմքերից մէկն է, առաջինը հասկացաւ, թէ այդ մեծ գործի՝ հայրենիքի վերածնութեան համար անհրաժեշտ է ժողովրդի պարտքի գիտակցութիւնը զարգացընել, անձնագոհութեան և հայրենասիրութեան զգացմունքը զարթեցնել: Նրա կարծիքով միայն Պրուսիան «իր առաքինութիւններով և իր հաստատութիւնները գերազանցութիւնով» կարող էր նմուշ ծառայել գերմանական ժողովուրդների համար և դառնալ նրանց միութեան իսկական կենտրոն: Աւստրիական Հաբսբուրգեան տունը նրա համար ժեզուհիտական էր, մինչդեռ Պրուսիայի Հոհենցոլերները կարողանում են իրանց երկրներում զարգացնել «ազատութեան և ճշմարտութեան ոգին», որ չի խեղդւում սոփեստութիւններով: Մի ուրիշ անգամ նա գրում էր, թէ «պրուսական հինաւուրց արքայիւտիզմը, որ անցեալում այդ երկրի մեծութիւնը ստեղծեց, կարող է նոյնն առնել այժմ և ապագայում»: Նրա ատելութիւնն այնքան մեծ էր դէպի ֆրանսիական յեղափոխութիւնը և դէպի նրա ոգին, որ նա իր այդ զգացմունքը տարածում էր նոյնիսկ բոլոր նրանց վրայ, որոնք մասնակից էին եղել այդ գործին:

Եւ Շտէյնը մենակ չէր. ուրիշ շատերը, պատմաբաններ և հրապարակախօսներ, միևնոյն ձգտումների, միևնոյն գաղափարների տէր մարդիկ՝ հանդէս եկան որոշ ուղղութեամբ և ոգով դաստիարակելու գերմանական նոր սերունդը: Այդ մարդիկն էին, որ 1819 թւին բարոն Շտէյնի ղեկավարութեամբ կազմեցին մի մեծ ընկերակցութիւն, որ գերմանական պատմագրութեան օրօրան եղաւ, ասում է Ա. Գիյան: Այդ ընկերութեան մէջ մտան այնպիսի յայտնի անձինք, ինչպէս Դահլման, Նեբուր, Գրիմմ եղբայրները, Սավինիի, Շլեգել, Շլոսսեր և ուրիշ շատերը: «Պրուսական հաստատութիւնների համար հիացմունք, ատելութիւն դէպի ֆրանսիական մեծ յեղափոխութիւնը, քաղաքական այս երկու գաղափարները դարձան սեփականութիւն բոլոր ազգային պատմագիրների: Իրաւաբանական պատմական դպրոցից հանուած պատմութեան փիլիսոփայութեան անունով՝ նրանք աշխատում են հաստատել երկու բան—ֆրանսիական յեղափոխութեան անանկութիւնը և Գերմանիայի պատմական-զարգացումը Պրուսիայի հիմքերի վրայ» *):

*) A. Gilland: «L' Allemagne nouvelle».

Շատ անգամ է ասուել, որ Գերմանիան իր մեծամեծ յաջողութիւններով պարտական է գիւղական դպրոցին: Դա ճշմարիտ է, բայց պէտք է աւելացնել և՛ զօրանոցը: Դպրոցում իշխող ոգին յաջորդաբար անցաւ զօրանոցը և այդ երկուորեակները պատրաստեցին Պրուսիայի մեծութիւնը: Ֆրիդրիխ Վիլհելմ III 1813 թւին հիմնեց Բերլինի համալսարանը: Սահմանափակ ընդունակութիւնների տէր այս թագաւորը իր ժամանակին ունեցաւ սակայն մի խելացի միտք, նա հասկացաւ, որ քաղաքականապէս, զինւորապէս թուլացած իր պետութիւնը պէտք է զօրացնել մտաւոր ոյժերով, ժողովրդի գիտակցութիւնը բարձրացնելով: Հովսեփ Դ, որ այդ համալսարանի ղեկավարութիւնը ստանձնեց, հրաւիրեց Գերմանիայի առաջնակարգ գիտնականներին: Այնտեղ խմբուեցին պատմաբան Նեբուր, աստուածաբան Շլէյմախեր, իրաւագէտ Սավինիի և լեզուաբան Բէռլէ: Վերջում եկաւ նաեւ ինքը Հեգել, այդ ժամանակի մեծագոյն փիլիսոփան, որ նկատուում էր, որպէս մտքի իշխան: Այս նշանաւոր անձինք իրանց ուրոյն-ուրոյն հայեացքների տակ՝ բերեցին սակայն մի ընդհանուր, հիմնական գաղափար—Գերմանիայի վերածնութիւնը:

Պատմութեան և իրերի վրայ համամարդկային, տիեզերական տեսակէտից նայող Կանտի և Գեթթէի Գերմանիան էլ չկար, տրորուած, ընկճուած, անարգուած, մի գոռոզ յաղթողի ոտների տակից բարձրացած՝ նա թողնում էր իր գեղեցիկ, մեծահոգի երազներն ու խոհերը, ոտքի էր կանգնում և ինքնապաշտպանութեան ընազդից մղուած, նուիրագործում էր ոյժի պաշտամունքը և ազգային եսասիրութիւնը: Պրուսիան, գերմանական ամենից աւելի պատժուած երկիրը այժմ ձգոււմ, լայնանում էր և պատում մնացած Գերմանիան իր դրական և քննադատական խիստ ոգով: Նիւթական, առարկայական միութիւնից առաջ դանդաղութեամբ զարգանում էր բարոյական միութիւնը գերմանական զատ-զատ երկիրների մէջ, և կենտրոնը, ուղղութիւն և ընթացք տուողը պրուսական ոգին էր, որ կոմս Մուլտէն մի տեղ արտայայտել է գինւորական խստասրտութեամբ և պրուսական պաղարիւնութեամբ հետեւեալ նշանակալից խօսքերի մէջ. «Փառք Աստուծոյ, ասում է Մուլտէ, որ չնայելով յառաջադիմութեանը, այնուամենայնիւ Պրուսիայում դեռ պահպանում է այնքան անգամ քամահրուած քաղաքական հնադարեան բեօմը, այն հին թէորիան, որ թոյլ է տալիս մարդկանց երջանիկ դարձնել հակառակ իրանց ցանկութեան»: Թէ մինչև որ աստիճան պրուսական ոգին ատեւութիւն էր տարածում գերմանացիների մէջ դէպի Ֆրանսիան և

այն բոլորն՝ ինչ ֆրանսիական է, ապացուցանում են հետևեալ բնորոշ փաստերը. պատմաբան Մենցելը գտնում էր, որ հարկաւոր է «ֆրանսիական արեան մէջ լուանալ Լուդովիկոս XVI-ի և Նապոլէոնի գերմանացիներին հասցրած անարգանքը»։ Տրէյ-չիկէն գտնում էր, որ «Ֆրանսիայի հետ դեռ մի հաշիւ կայ մաքրելու»։ Գիներալ Րօօմը գրում էր 1870 թ. պատերազմը յայտարարելու առիթով. «Որպիսի երջանկութիւն! ինչ որ յոյս ունէինք մեր ամբողջ երիտասարդութեան շրջանում, վերջապէս կատարուեց... զալլօ-ֆրանկներէից մեր վրէժխնդրութիւնը երկու հարիւր տարի յետոյ... Այո, խոստովանում եմ, որ ես կը զոհէի մի կամ մի քանիսը իմ զաւակներից այս մեծ գործի համար—երկու հարիւր տարուց ի վեր մեր կրած բոլոր անարգանքները մաքրելու համար։ Թէ մինչև որ աստիճան խորն է գերմանական քինախնդրութիւնը, ապացուցանում է արդէն յիշուած պատմաբան Մենցելի հետևեալ տողերը. «Հոռմի մնռնող զլադիատորը պէտք է հայրենասիրական դայրոյթով լցնի իւրաքանչիւր գերմանացի տուրխատի սիրտ այն ժողովրդի դէմ, որ թոյլ էր տալիս հին գերմանացիներին (ժերմեն) ծառայեցընել իր հաճոյքներին»։*) Այս բոլորը կարդալուց յետոյ մարդ մտածում է, որ Հէյնէն իրաւունք ունի, երբ ասում է, թէ «գերմանացիք աւելի քինախնդիր են, քան բոմանական ժողովուրդները, որովհետեւ նրանք (գերմանացիք) աւելի իդէալիստ են նոյնիսկ իրանց ոխի մէջ։ Մեր թշնամիների մէջ, շարունակում է Հէյնէն, մենք ասում ենք ամենաէականը, ամենաներքինը—նրա միտքը» **):

Բաւականանանք այսքանով և դառնանք գերմանական խոշոր պատմագիրներին, որպիսիներն են՝ Ներուր, Բանկէ, Մոմզէն, Զիմըրլ, Տրէյչիկէ, որոնց ազդեցութիւնը իրանցից անկախ, թէ դիտաւորեալ՝ ահագին է եղել նոր Գերմանիայի վրայ։ Բայց այդ մասին յաջորդ անգամ։

Ա. ԱՀԱՐՈՆԵԱՆ

*) A. Guiland: «L' Allemagne nouvelle».

**) Heine: «L' Allemagne», T I. p. 94.